

重刊江甯府志卷之三十八

人物五 仕績

漢張磐字子石丹陽人爲交趾刺史以清白稱時荊州賊胡蘭餘黨南走蒼梧刺史度尙僞上言蒼梧賊入荊州界遂徵磐下廷尉會赦磐不肯出獄因自列曰磐爲尙所枉赦無所除乞傳尙詣廷尉面質廷尉以其狀上詔徵尙至辭窮受罪同郡陶謙字恭祖除舒令磐爲廬江太守初磐與謙父友意殊親之而謙恥爲之屈謙性剛直有大節在官清白後漢書有傳

抗徐字伯徐丹陽人少爲郡佐有膽智策略三府表徐有將率之任特遷長沙太守擊桂陽賊胡蘭朱蓋等大破斬之事見後漢桓紀延熹八年注引謝承書

吳葛祚字元先句容人任衡陽太守郡有大槎橫水爲妖祚乃大

具斧斤之屬將往伐之其夜居民聞江流增竑有聲旦往視槎則移去下流數里駐於灣中自是行者無覆溺之患事詳法苑珠林晉陶璜字世英丹陽秣陵人仕吳爲交州刺史平交趾董元等吳亡歸晉封宛陵侯勸弛珠禁晉滅州郡兵璜上言諫止之事詳晉書本傳

紀瞻字思遠丹陽秣陵人瞻才兼文武忠亮雅正以討周馥華軼功封都鄉侯論討陳敏功封臨湘侯歷官領軍將軍加散騎常侍王敦之逆瞻力疾護六軍事詳晉書本傳

薛兼字令長丹陽人清素有器宇甚勤王事拜安陽鄉侯累官丹陽太守領太子少傅事詳晉書本傳

甘卓字季思丹陽人討石冰預平周馥征杜弢屢立戰功歷官安南將軍梁州刺史假節督沔北諸軍鎮襄陽悉除估稅檄天下討

王敦尋爲所害事見晉書本傳

張閭字敬緒丹陽人初補晉陵內史興陂溉田蘇峻之役與陶回共督襄陽義軍峻平封宜陽伯事詳晉書本傳

陶回丹陽人蘇峻之役言於王導請出兵出守江口又收合義軍豫平峻亂別破韓晃以功封康樂伯桓景佞事王導回力陳其姦累官領軍將軍加散騎常侍事詳晉書本傳四子汪陋隱無忌咸有幹用並見回傳

梁昌義之歷陽烏江人少有武幹從高祖出兵戰功最多魏寇鍾離城中眾纔三千人義之多方抗禦殺傷魏以萬計會援兵至城卒得全授都督北徐州緣淮諸軍事平北將軍北徐州刺史事詳梁書本傳

陶季直丹陽秣陵人齊武帝作相季直不能阿意出爲北海太守

尋遷建安太守政尚清靜事詳梁書止足傳

丁咸序秣陵人以儒學名授衡陽判官有政聲

南唐邊鎬金陵人破白雲洞賊豫平建州復取潭州又佐元宗平湖南歷官武安軍節度使事詳陸游南唐書

周宗字君太秣陵人烈祖將迎讓皇宗諫止之以贊禪功晉官樞密使奉法循理事詳馬令南唐書

宋陳承昭昇州人督治漕河都人利之從征太原承昭獻計請壅汾水灌城會班師功不克就歷官右龍武軍統軍事詳宋史本傳
孫繼鄴字元嗣金陵人上禦戎策十數事宣州陳進反繼鄴破賊於象州樞密使曹利用欲用之鄴惡其權盛數以疾辭後官至涇原路都總管兼知渭州事詳宋史本傳

秦義字致堯江甯人累官東染院使知蘇州遷內園使知泉州歷

財貨之任精勤練習事詳宋史本傳

邵亢字興宗丹陽人趙元昊之叛亢獻兵說十篇仁宗繼嗣未立亢屢疏言之張貴妃薨立園陵亢疏罷之夏人之亂朝議將謀西討亢以財力殫屈未宜用兵條上其事累官資政殿大學士事詳宋史本傳從父必字不疑累官寶文閣直學士權三司加龍圖閣學士居官震厲風采時雄州種木道上契丹遣人夜伐去又數漁界河中必奉詔以理折契丹屈之事附亢傳

盧鑑字正臣金陵人武帝特授右侍禁知儀州州有制勝關李繼遷入寇將乘虛襲取之聲言由此大入有詔徙老弱於內地鑑上言此敵姦謀不敢奉詔賊亦不至事詳宋史本傳

張頡字仲舉金陵人徙鼎州官江陵推官歲饑頡條獻十事海南黎人請出兵自効頡奉命處其事使一介往呼之出補以牙校事

詳宋史本傳

王綸字德言建康人以薦爲監察御史忤秦檜罷去高宗二十九年出使金人事詳宋史本傳

張邵字才彥烏江人出使金人詞氣不屈十三年始南還以敷文閣待制提舉江州太平興國宮知池州宋史有傳子孝曾亦以出使歿於金事見邵傳從子孝祥字安國居官政尙簡易庭無滯訟厯官中書舍人除直學院兼都督府參贊軍事兼領建康畱守宋史有傳又孝伯亦邵從子登隆興元年第累還參知政事韓侂冑當國孝伯勸弛僞學禁復故相趙汝愚官一時賢人貶斥者賴以漸還

魏良臣字道弼溧水人母病刲股以進宣和三年登進士第授丹徒尉詣闕伸陳東冤徽宗南巡上疏請還闕不報尋調嚴州壽昌

令遷吏部員外郎金人犯高郵良臣奉使講和與之盟而退尋擢
吏部侍郎金人敗盟良臣復奉使兀朮營金人欲畫江爲界良臣
反復持論卒定議如初秦檜忌之出知池廬二州檜死召參大政
首請出衣冠之囚歸蠻瘴之冤起淹抑斥姦回竟以資政殿學士
出知紹興復厯知宣州潭洪諸郡卒諡敏肅

秦梓字楚材江甯人少有才名登宣和閒進士授太學錄擢樞密
院編修厯知台秀袁太平常湖六州除翰林學士出知宣州民詣
闕請畱再移湖州致仕歸弟檜當國梓惡其所爲遂自江甯徙家
溧陽

李可六合人咸淳閒爲監察御史與御史陳過疏論賈似道黨朝
論快之

元王均容字受甫任江陰令縣故多火葬及溺女之事均容至嚴

重刊江甯府志 卷之二十一
禁之擢戶部郎出知廬州以疾歸

明周楨字文典江甯人官大理卿定律令尋出爲廣東參政屢吏感動事詳明史本傳

端木復初字以善溧水人性清白杭州飛糧事覺逮係百餘人詔復初往治誠僞立辨尋出爲湖廣參政一年流亡畢集子孝文翰林待詔孝思翰林侍書先後使朝鮮並著清節

馮榮烏江人洪武初以才辟知華亭縣時海濱盜起旣克榮爲言於統兵請罪渠魁而貸良民之脅從者免死數萬人

蕭叔裕溧水人洪武閒由辟召爲夔州府經歷州瀕江多盜吏不能詰叔裕捕治其魁蜀盜屏蹟尋謝病歸

居輔字相之句容人任四川重慶通判遷山東青州通判時邊事騷擾歲歉民飢輔賑卹有方民懷其德

戎簡句容儒士有智識高帝與諸將論用兵因諭之曰汝等非不善戰然臨事決機知或不足宜親近儒者意蓋謂簡也

孔克仁句容人由行省都事進郎中嘗侍太祖數論天下形勢及前代興亡事太祖志圖中原克仁以積糧訓兵觀釁待時爲言語詳明史本傳

趙本字居仁溧水人洪武閒以薦辟厯官左通政治水浙江本以文請於水神潮果不至三日而功成

徐輝祖中山王達長子洪武中嗣魏國公靖難兵起輝祖帥師禦戰斬其驍將李斌等十數人北師大懼文皇卽位輝祖不屈孫承宗守備南京兼領中。公廉卹士有賢聲事並附明史徐達傳

陳明善句容人洪武初以明經薦知六安州山賊潘文友聚眾劫掠明善命子真率眾捕獲郡賴以安

笄僖笄志皆句容人僖從太祖起義封千戶子貴征交趾有功官金吾衛指揮世襲志從太祖將兵克婺州破鄧青封錦衣衛百戶子端復從成祖破大同克滄州平山東官濟陽衛指揮世襲

魏澤字彥恩高淳練城人洪武中官刑部尚書建文時謫海甯尉時文皇逮方孝孺誅及族黨孝孺幼子德宗甫九歲澤力爲維護台州秀才余學夔心知之一日返澤於城隅澤乃密致孝孺文稿及德宗於學夔遂得免

金玉江浦人從靖難起兵有功又討平山西妖賊劉子進論前後功封惠安伯事附明史薛祿傳

曹義字宜之句容人永樂乙未進士累官吏部右侍郎黜陟賢否罔有不當己巳秋北兵犯京師奉勅提督官兵守備正陽門晝夜巡察防範嚴謹敢不收近天順初晉官南吏部尚書致仕歸

金紳上元人潤之子景泰閒進士性狷介嚴毅由庶吉士授刑科給事中歷官刑部右侍郎成化閒奉命巡視江西災以便宜行事至則休力罷征裁冗減獄境賴以甯紳子麟壽亦知名

夏輯字良成高淳人任沙縣令忤劉瑾被黜瑾敗補瑞安調曲江以疾歸

張彥彭溧水人永樂閒歷官河南道御史清慎持憲成祖賜金牌百面以褒之

楊勉江甯人永樂中舉進士授刑部主事治獄明恕特陞本部右侍郎諸司獄上勉畱心詳察具得幽隱尋坐事出於外後官至廣東參政

許英字士華高淳人永樂閒進士任莆田知縣調侯官邑邑有僧寺婦女入者輒不返英率眾至寺聚眾僧局一室中盡搜得所匿

婦女悉還其家遂積薪寺門併僧焚之尋推陝西道御史

鄭自強江浦人洪武閒以薦舉授浙江甯波衛經歷清介自持卒祀鄉賢祠

李時勉名懋以字行上元人徙安福任翰林侍讀條上時務十五事洪熙元年復上疏言事仁宗怒甚召對便殿不屈英宗北狩日夜悲慟上書請選將練兵事詳明史本傳

蔣用文句容人仁宗監國用文與黃淮蹇義同輔知無不言一日論殺囚數百人用文從容爲言可矜狀上悉宥之卒謚恭靖孫誼中成化二年進士授杭州推官擢御史風紀肅然著有經緯文衡紀行錄石屋文鈔憨翁新錄諸書

姜璿字子澄江甯人工書仁宗在東宮召寫金字經由中書舍人出守廣南府璿開誠布公靡然向化晉安察副吏督學政

王麟上元人宣德閒由儀徵教諭轉國子監學政歷官四川山東按察司僉事督學政有政聲天順初進階奉議大夫

丁璿上元人正統閒征麓川璿督宣府大同軍儲尋言用兵便宜麓川平以功召爲左副都御史所至有聲事附明史李儀傳

張瑄字廷璽江浦人知吉安府時歲饑陳牒上官發廩振貸討平廣西江浙諸路賊累官南刑部尙書事詳明史本傳

張紳字仲書句容人正統閒進士授行人陞雲南道御史清理屯田陞陝西僉事時有邊警治軍餉有功晉參政

王興宗上元人任金華知縣以治行聞時方籍民爲軍興奏止之事附明史王家顯傳

倪岳字順咨上元人父謙奉使朝鮮丰采凜然終南京禮部尙書諡文僖岳性敏捷累官吏部尙書於歲終每彙次四方災異勸帝

勤講學開言路十數事疏論西北用兵之害事詳明史本傳岳弟
阜字舜薰一字東岡官庶吉士岳卒阜請於朝護喪歸尋參政山
東地方多盜阜擒治首惡餘黨悉平歷官有清操

陳綱字堅遠應天人任黔陽知縣邑多水患綱採石甃隄千餘丈
山崖官道徑窄行人多墮厓死綱積薪燒山拓徑丈許事詳明史
循吏傳子沂見後文苑傳

王徽字尚文應天人任南京刑科給事中疏陳四事末言宦官之
害甚詳又劾中官牛玉罪謫貴州普安通判事詳明史本傳子韋
見後文苑傳

翟瑄字廷瑞南太醫院籍與弟瑛並以孝友聞瑄舉天順甲申進
士由奉化令擢御史晉僉都御史巡撫山西又晉左都御史尋陞
刑部尚書數斷大獄多所平反雖徒杖以下必詳獻焉英石或進

士官兵科給事中封事數十上於時政多所裨益累官太常寺正卿

龍夔江甯人官戶部員外郎性峭直有祠官附權貴乞免家徭役夔執不可

李昱字景陽江甯人累官雲南按察使僉事辨雪冤獄貪墨望風引去朝野重之

黃縉字明章六合人天順閒任直隸邯鄲縣有鄰境官被誣監司委勘縉廉得其情風力大著陞湖廣黃州府通判

詹侗字良弼六合人天順閒授河南修武縣縣積有逋負侗念其疲累特疏於朝遂獲蠲免後以不媚權要調福建永春縣

謝瑄字廷璧六合人任山東東昌府通判河決奉勅往治瑄竟底績陞江西吉安府同知歷湖廣寶慶府同知以疾致仕

朱銓字士選金陵人豫修兩朝實錄性清介居官廉平歷官翰林院侍書天順中進刑部侍郎改貴州右參政致仕歸

凌錦字日章句容人隸忠武前衛北兵寇京師錦從副將軍戰於彰義門追奔至紫荆關以功授百戶景泰初破貴州苗進副千戶天順初進指揮同知謫戍涼州尋召復職遂以疾告歸

胡漢句容人天順閒進士授陝西澄城縣教諭值賊寇犯邊分巡憲嚴某素黷賄迫漢署澄城令漢蒞任後一無所餽嚴遂誣以失誤邊儲罷職

楊洪字宗道六合人父璟戰死靈璧洪代李謙爲都督僉事進都指揮使久居宣府御兵嚴肅屢敗也先兵爲一時邊將之冠事詳明史本傳

巫凱句容人歷官遼東都指揮使時中國人自塞外歸者有詔悉

送京師凱上言令得自便嘗使造舟松花江凱力請罷其役既而役復興中官阮堯民等多不法凱劾堯民下之吏事詳明史本傳童軒字士昂南欽天監籍景泰閒進士授南吏科給事中時貢翠毛魚魷諸物以萬計軒上疏諫止之奉命撫蜀寇軒親歷賊壘宣布威惠賊羅拜乞生乃悉遣散歸農以南京禮部尚書致仕卒贈太子少保賜祭葬

鄭禮字中夫江甯人任襄陽府通判以平寇功進大名府同知擢守南安郡郡苦水患禮欲發倉賑民監司以未上請難之禮曰待報而後發民皆委溝壑矣如以矯制罪守守無所恨卒行之孫濂字師周以孝友聞舉嘉靖閒進士授山東道御史出爲湖廣按察使有清名

紀廣句容人累官後軍都督府右都督鎮守萬全寇不敢犯邊民